

YOSUA

Zìblena Kanaa bùsua 1:1-11:23

Yosua lézamma kōn à ganao 23:1-24:33

Dii yādiēna Yosuanē

¹ Dii zòbleri Musa gaa gbera Dii yā ò Musa kpàasi Yosua, Nuni néné à bè:

² Ma zòbleri Musa gà. N fεε ò bikū Yodaa kè sa, mpi kōn Isarailinò ò píngi, à gē bùsu kè má kpàawaan.

³ Guu kè a gbá pèen píngi, má kpàawa lán má ò Musanē nāmē.

⁴ Sena zaa gbáan ai gana Lebanò bùsun, sena zaa swa bíta kè wè be Yuflati ai gana ísaa kè kú ɔfāntēgēkpen kpa, Itinò bùsu pì é gō a bùsu ũ píngimē.

⁵ Ai ò gá gao gbēke é e à n gāsā fīro. Lán má kú kōn Musao nà, len mégō kúnyo lē. Mé n tónlo, mé pā kpánzi zikiro.

⁶ N zε gbāa ògō wórɔngɔ vī, zaakε mbe né bùsu kè ma à lé gbè a dezi káakunɔnε ma bè mé kpámma sí ò kpá gbē kènɔa.

⁷ N zε gbāa ògō wórɔngɔ vī dé! N làakari dɔ doka kè ma zòbleri Musa dānnεεa ògō kūna píngi. Nton kēa ò na ɔplazi ke ɔzεziro, n tá égae ke nna.

⁸ N tó Musa doka takada pì yā gō da n lén, ògō laasuu lεεa fāantē kōn gwāavīo. N làakari dɔ yā kè kú à guunɔa píngi ò zīi kēa, n tá égō nna n yā égae bɔ maa.

9 Mámbe ma yã dienneroo? Ñ ze gbãa ñgõ wórɔngɔ vī. Ñton tó vīa n kũro. Ñton bídi kero, zaake mamoma Dii n Luda, mégõ kúnyo guu kè néε gaan píngi.

10 Ben Yousua bè Isaraili don'aεdeenɔne:

11 À gēte bũran à o gbēnɔne aõ kūsãε soru ke, zaake gurɔ aagõɔ gbera aõé bikũ Yodaa kè, aõé gá bũsu kè Dii n Luda kpaámma wàgõ vī sí.

12 Yousua bè Rubeninɔne kɔn Gadano kɔn Manasenɔ kpadoo:

13 À do yã kè Dii zòbleri Musa diεaree kèkiin, à bè Dii a Luda é tó à kámmabokii e à bũsu kèkii kpaáwa.

14 Beee yãnzì a nɔgbēnɔ kɔn a né fétenɔ kɔn a pókádeenɔ gõ bũsu kè Musa kpaáwaan Yoda baa kè kpa, a zìkpeenɔ do n gbēnɔne aε wà bikũ n píngi, aõgõ n gõkebɔnɔ kũna aõ dońle

15 ai Dii gõ tó a gbēnɔ kámmabokii e lán à kèare nà, aõpinɔ sõ égõ bũsu kè Dii a Luda e kpaámma vī. Beee gbera é su bũsu kè gõ a pó ũu kè guu, é vëε bũsu kè Dii zòbleri Musa kpaáwa Yoda baa kè ɔfántēbɔε kpaá pin.

16 Ben aõ wèàla wà bè: Yã kè n diεwe píngi wé ke. Guu kè n wa zĩin píngi wé gáme.

17 Lán wa zĩi kè Musa yãa nà píngi, len wé zĩi ke n yãa le se. Dii n Luda gõ kúnyo, lán à kú kɔn Musao nà.

18 Gbē kè bò n yã kpeε à gí yã kè n diεne kezi, adee gáme. Ñ ze gbãa ñgõ wórɔngɔ vī dé!

2

Gu'asiigwarinɔ zĩna Yeriko

1 Zaa Sitimu Nuni né Yousua gu'asiigwarinɔ zĩ gɔɔn plaa asii guu à bè: À gá à wée kpáε bùsu pìzi, atēnsa Yeriko. Ben aɔ gaa gwe, aɔ gaa wà pita kaarua kè wè sísi Rahabu been.

2 Ben wà bè Yeriko kɔnanε: Isaraili kenɔ gè kè uusia le wà wa bùsu asii gwa.

3 Ben kina pì gbēnɔ zĩ Rahabua aɔ bè: N bɔ kɔn gɔgbē kè aɔ mò n kiianɔ, zaake wa bùsu píngi asii gwana yānzin aɔ mòzi.

4 Àε sɔ nɔgbē pì gĩake à gɔɔn plaaa pìnɔ ùte kò, ben à bè: Gbē pìnɔ mò ma kiia kè yápura. Má dɔ guu kè aɔ bɔnlo.

5 Kè guu sì bĩzetatagurɔ, aɔ bɔε. Má dɔ tó mákpan aɔ tànlo. À n gbè sé kpakpaa, é n le.

6 Àε sɔ à gĩake à n sé à gaańyo kpé musu à n úte gbɔɔ lí kè kaena gween kò.

7 Zĩrinɔ pèéńzi zén ai Yoda bikúkiia, ben wà bĩize tàta n kpee gɔɔ.

8 Ai gu'asiigwari pìnɔ gɔ daε, Rahabu òidi n kiia kpé musu

9 à bènnε: Má dɔ kè Dii bùsu kè kpàawa. A vĩa wa kũ, ben bùsu kè deenɔ kã gà n píngi a yānzi.

10 Wa mà lán Dii Isia Tēaa zòkɔreare nà gurɔ kè a bɔε Igipiti kɔn yā kè á kè Siɔ kɔn Oguone, a Amɔrinɔ kina gɔɔn plaaa pìnɔ kè dúgudugu Yoda baa kaa kpa.

11 Kè wá mà, swè kèwagu, wa ninii dà batan a yānzi, zaake Dii a Ludan musu kɔn tɔɔteo Luda ũ.

12 Zaake ma gbēkεε kèare, apinɔ sɔ à síme sa kɔn Dii tóo kè é gbēkεε ke ma de bedeenɔne. À sèeda keme le màgɔ dɔ sãnsã

13 kè é ma de kōn ma dao kōn ma vīnō kōn ma dāaronō kōn wa gbēnō mī sí n pīngi à wa bō gaa lézī.

14 Ben gōgbē pīnō wèàla wà bè: Mbe wa wèndi ũ, wámbe n wèndi ũ se. Tó nées wa yā o gbēkee mào, tó Dii bùsu kè kpàwa, wé gbēkēe kenne yāpura.

15 Ben à n bōe windo guu à n píta bīi kpēe kōn bào, zaake à bēe kè à kún kú wéte bīi musume.

16 À bèñe: À mī pè kpiinōa le a gbèserinō tón dakōreaoro yānzi. Àgō utena gwe gurō aagō ai a gbèserinō su, é gbasa à da zén.

17-18 Ben gōgbē pīnō bèñe: Tó wa eara wa gē a bùsun, n wō tēaa kèkii dō windo kè nées wa bōeen kèa, n n de kōn n dao kōn n vīnō kōn n dāaronō kōn n de bēdeenō kakōanzi n pīngi n kpé kèkiin. Tó nées ke lero, wa bà égō kú ladana kè n tò wá la dānneen dōro.

19 Tó aō gbēke bō n kpén à gāa gāale, à a zīnda dèn gwe, wa yān dōro. Tó aō gbēkee kúnyo kpén, ben wà à dè, wámbe à gana yā é wí wa musu.

20 Tó n wa kōmōtō kè gbēnōne sō, wa bà égō kú ladana kè n tò wá la dānneen pīn dōro.

21 Ben Rahabu bè: Àgō de lán á ò nà. Ben à n gbáe aō tà. Ben à wō tēaa pì dō a windoa.

22 Kè aō píta bīia le, aō mī pè kpiinōa, ben aō ì gwe gurō aagō ai n gbèserinō gāa sùo. Aō gbèseri pīnō n wéte zé sae pīngi aōe n ero.

23 Ben gōōn plaaa pīnō dà zén aō píta kpiii pīnōa aō bikù swaaa. Kè aō kà Nuni né Yousua kiia, aō yā kè à n lé gbāne pīngi

24 wà bè: Dii bùsu pì nàwe wa ozi pīngi. Bùsu pì deenō ká gá n pīngi wa yānzi.

3

Isarailinɔ bikũna Yodaa

¹ Yɔsua fɛɛ kɔngɔ idɛ'idɛ kɔn Isarailinɔ n pɩngi. Bɔna Sitimu aɔ gaa Yodazi, ben aɔ bura kaa gwe ai aɔgɔ gá bikũ.

² Guro aagɔɔ gbera Isaraili don'aedeeno dɔdɔ burazi

³ aɔ yã diɛ gbɛnɔnɛ wà bè: Tó á è Levi bori sa'orinɔ Dii a Luda bà kuunawao àkpati sena, à da zén àgɔ té n kpeɛ,

⁴ le à e à dɔ zé kè é sé, zaake ée zé pì sé zikiro. Àgɔ té zàazã lán kiloo do taka bàɔɔ! Àton sɔ àkpati piziro.

⁵ Ben Yɔsua bè gbɛnɔnɛ: À gbãsi bɔ a zĩndan, zaake Dii é yãbɔnsaɛ ke a té zia.

⁶ Ben à èara à bè sa'orinɔnɛ: À Dii bà kuunawao àkpati sé à dɔ gbɛnɔnɛ aɛ à bikũo. Ben aɔ àkpati pì sè wà dɔo gbɛnɔnɛ aɛ.

⁷ Dii bè Yɔsuane: Mé na n sena leziã Isarailinɔnɛ gbãa, aɔégɔ dɔ kè má kúnyo lán má kú kɔn Musao nà.

⁸ N o sa'ori kè aɔɔ ma bà kuunaao àkpati senanɔnɛ, tó aɔ kà Yodazi, aɔ gɛ wà ze à ín.

⁹ Ben Yɔsua bè Isarailinɔnɛ: À mó kè à Dii a Luda yã ma.

¹⁰ Ben à èara à bè: Len égɔ dɔ kè Luda Wèndidee kúao le, bensɔ eé péare Kanaanɔa kɔn Itinɔ kɔn Ivinɔ kɔn Perizinɔ kɔn Gigasinɔ kɔn Amorinɔ kɔn Yebusinɔo.

¹¹ À gwa! Anduna pɩngi Dii bà kuunawao àkpati é dɔare aɛ ai Yoda ín.

¹² À gɔɔn kuri awɛɛplaaano sé a té, bori kɔn boriio gbɛ mèn doodo.

13 Tó sa'ori kè aṣo anduna pínɡi Dii àkpati senano gbá pèe Yoda ín, í pì é zòkòre, í kè èe bɔɔ swaa musu é bii kè à gɔ zena a gbèn.

14 Kè gbèno bùra fèe wà dà zén, aṣo e gaa bikū Yodaa, sa'ori kè aṣo Dii bà kuunańyo àkpati senano té n̄ a e le.

15 Pókèkèguro pínɡi swaa pì è pa ai à dà s̄s̄ila, m̄ode guro kè àkpatiseri p̄ino kà swaa p̄izi, kè aṣ gbá pèe ín,

16 ben í kè èe bɔɔ swaa pì musu zòkòre à bii kè à gɔ zena a gbèn zaa z̄az̄a wéte kè wè be Adamu sae Zarət̄a bùsun. Í kè èe taa sèbe wisideen zòkòre m̄óm̄io, ben gbèno bikū aedok̄ana k̄n̄ Yerikoo.

17 Sa'ori kè aṣo Dii bà kuunańyo àkpati senano gɔ zena Yoda wèen t̄ote koria gínɡin, ben Isaraili bori pínɡi té gukori p̄in ai aṣ ḡaa wà bikū n̄ pínɡi wà ȳaa.

4

Gbè mèn kuri awɛɛplaaano didik̄ana sèeda ũ

1 Kè Isaraili bori pínɡi bikū Yodaa wà ȳaa, ben Dii bè Yosuan̄e:

2 A bori mèn kuri awɛɛplaaano té à gbèno s̄en doodo

3 n̄ on̄ne aṣ gbè s̄ee swaween mèn kuri awɛɛplaa guu kè sa'orin̄o zen s̄úusu, aṣ bikūo wà k̄ae guu kè é in gw̄av̄ia.

4 Ben Yosua ḡɔn̄ kuri awɛɛplaaano dīe Isaraili borīno té doodo, ben à n̄ sísi

5 à bènn̄e: À gá Yoda wèen Dii a Luda àkpati a e, a baade gbè sé à di a ḡan̄ a Isaraili borīno pari lén.

6 Gbè kèkīino é ḡoare sèeda ũ. Tó a n̄eno a la zia, b̄on̄ gbè k̄en̄o deare à ũ,

7 à beñne, kè wèe bikũu kõn Dii bà kuunawao àkpatio, ben à í zòkõre, ben gbè pìno gò Isarailinõne à dõngu pò ù ai gurõ píngi.

8 Len Isarailinõ kè le lán Yosua òñne nà. Aõ gbè sèe Yoda wèen mèn kuri awèeplaa Isaraili boriinõ pari lén lán Dii ò Yosuanè nà. Aõ bikũò aõ kàe guu kè aõ ìn.

9 Gbè mèn kuri awèeplaaa kè wà sèe swawèen sa'ori kè aõ àkpati sena pìno zekiaan Yosua didikõa, aõ kú gwe ai kõn a gbàao.

10 Sa'ori kè aõ àkpati pì senanõ gò zena swawèen ai yã kè Dii diè Yosuanè à ò gbèñõne gàa à kèò píngi lán Musa diène nà. Gbèñõ kè kpaà aõ bikũ.

11 Kè aõ bikũ ñ píngi wà yàa, gbasa sa'orinõ bikũ kõn Dii àkpatio gbèñõ wáa.

12 Rubeni bori gògbèñõ kõn Gada bori gògbèñõ kõn Manasenõ kpado gògbèñõ bé wà dò Isaraili bori kpaanõne aè wà bikũ lán Musa òñne yã nà. Aõ ñ gòkèbõnõ kũna.

13 Aõ zìkpèenõ kà gõõn bõrõ baplaa taka. Aõ bikũ Dii aè aõ gàa Yeriko gbáan kõn zì soruo.

14 Zì beeean Dii Yosua sè lezì Isarailinõne ñ píngi, ben aõ à yã mà ai à gàa à gào lán aõ Musa yã mà nà.

15 Ben Dii bè Yosuanè:

16 Ñ o sa'ori kè aõ doka àkpati senanõne aõ bõ swawèen.

17 Ben Yosua òñne aõ bõ swawèen,

18 ben aõ bòn. Kè aõ gbá pèe sìsĩa, ben swa'i èara à sù a gbèn gõ. À pà à dàgula ai à dà sìsìla lán káakupõ bà.

19 Mõ káaku gurõ kuridee zìn Isarailinõ bõ Yoda swawèen aõ gàa wà bùra kàe Giligala, Yeriko

ɔfãntɛ̀bɔɛ kpa.

²⁰ Yousua gbè mèn kuri awɛɛplaaa kè wà sèɛ Yoda wèen pìno didikɔa Giligala gwe.

²¹ À bè gbɛ̀nɔnɛ: Tó a nénɔ gà wà n denɔ là zia wà bè, gbè kènɔ yáasi de diamɛ?

²² À bénne, a bikũna Yodaa gukoria sèedame,

²³ zaake Dii a Luda à í bàbaare a zén, ben a bikù lán a bikù Isia Tɛaa kè à à í bàbaareea nà.

²⁴ Dii kè le, le anduna bori píngi gɔ dɔ kè à gbãa vī, apino sɔ àgɔ Dii a Luda vīa vī gurɔ píngi.

5

¹ Kè Amɔrinɔ kína kè aɔ kú Yoda ɔfãntɛ̀gɛ̀kpen kpaanɔ kɔn Kanaanɔ kína kè aɔ kú ísɔaa saenɔɔ mà lán Dii Yoda í zòkɔre Isarailinɔnɛ aɔ bikù nà, ben swè kèngu aɔ ká gà n píngi Isarailinɔ yãzi.

Bàngukɛna Isarailinɔnɛ Giligala

² Gurɔ beea Dii bè Yousuanɛ: N gbè fɛ̀enɔ ke n ɛara n bangu ke Isarailinɔnɛ.

³ Ben Yousua bè wà gbè fɛ̀enɔ ke, ben wà bangu kèo Isarailinɔnɛ guu kè wè be tia Gefɔɔ Sìsī.

⁴ Yã kè tò à bangu kè́nne yè. Isarailinɔ bɔena Iyipiti gbera, aɔ tá guu, gɔ gbãaa kè aɔ bangu kènɔ gàga gbáan n píngi.

⁵ Gbɛ̀ kè aɔ bɛ̀e Iyipitinɔ bàngukɛna n píngi. Gbɛ̀ kè wà n í gbáan zé guu bɔna Iyipiti gberaanɔ, aɔmbe aɔɛ bangu kero.

⁶ Isarailinɔ tɛ̀ gbáan wè baplaa ai gbɛ̀ kè aɔ de gɔ gbãaanɔ ũ gurɔ kè aɔ bɛ̀e Iyipitinɔ gàa wà gágao n píngi, zaake aɔɛ Dii yã maro. Dii bénne aɛ́ wéɛ

si bùsu kè a à lé gbè ní dezinone à bè é kpármalero, bùsu kè zwi kōn zó'io din pì.

⁷ Aō né kè Dii tò aō fēe ní gberaanon Yosua bāngu kèñne, zaake gefoodeenome, wèe bāngu kèñne zénlo.

⁸ Kè Isarailino bāngu kè ní píngi wà yāa, aō gò guu kè aō bùra kàen gwe ai ní bò gāa à yāao.

⁹ Ben Dii bè Yosuanē: Ma wí kè Igipitinoo dàawaa bòare gbāan gwe. Ben wà tó kpà guu pìne Giligala ai kōn a gbāao.

¹⁰ Isarailino bùra kaena Giligala ben aō Banla zībaa kè Yeriko gbāan gwe moo pì gurō gēro do-saidee zī uusia.

¹¹ Kè wà zībaa pì kè guu dō aō bùsu pì bura póno blè, burēdi sése'ēzēsaino kōn pówēē kpatanao.

¹² Aō bùsu pì bura póno blena gbera, kè guu dō, manakwēena zè, èe kwéēñne dōro, ben aō Kanaa bùsu blēē blè wè beea sa.

Dii zìkpēeno dōn'aēdee

¹³ Kè Yosua kà kīi kōn Yerikoo, à wéē sè à guu gwà, ben à gōgbē ke è zēna a aē kōn fēēdaao na à ozi. Ben Yosua sōzi à à là à bè: Ní kú wa kpēen yó, ke wa ibēeno kpēē?

¹⁴ À wèàla à bè: Lenlo. Dii zìkpēeno dōn'aēdeen ma ū, ma kanan yè. Ben Yosua kùēne à mì pēē, ben à à là à bè: Bón ma Dii é o mamoma a zòblerinē?

¹⁵ Dii zìkpēeno dōn'aēdee pì wèàla à bè: Ní n kyatee bōbo, zaake guu kè ní zén kú adona. Ben Yosua kè lē.

6

Yeriko bī lēna

1 Wà Yeriko bīize gbàno tàta gíngin Isarailino yānzi. Gbēkee e boro, gbēkee e gēro.

2 Ben Dii bè Yosuane: Ì gwa, ma Yeriko nànnè n ɔzī kōn à kínao kōn à zìkpèeno.

3 Mpi kōn n zìkpèeno à gá liga wéte pìzi gèn do a píngi à su. Àgō ligaaazi le gèn doodo ai guro swèedo.

4 Sa'ori gōon swèeplaaano do àkpatine ae aḡḡ kuu kūna. À guro swèepladee zī à liga wéte pìzi gèn swèeplaa guro kè sa'ori pìno e ní kuu pèe.

5 Tó aḡ kuu pè aḡe à bà gaa, ben a à ɔ mà, gbē píngi wii lé gbāngbān, wéte bīi é lé, a baade é sin súusu.

6 Ben Nuni né Yosua sa'orino sìsi à bènnè: À Dii bà kuunawao àkpati sé, a gōon swèeplaaano é done ae, a baade éḡḡ kuu kūna.

7 Ben à bè gbēno: À fèe à gá liga wétezi gèn do. Zìkpèeno bé wà do Dii àkpatine ae.

8 Kè Yosua yā ò gbēno, ben sa'ori gōon swèeplaaa kè aḡ kuu kūna pìno fèe wà do Dii bà kuunaño àkpatine ae, aḡe ní kuu pèe.

9 Zìkpèeno té sa'ori pìno ae, parii té àkpati kpèe, bensō kuuno ɔ do.

10 Yosua gīake à ò gbēno à bè: Àton wii léro. Àton tó wà a kīi maro. Àton tó yāke bo a lénlo ai guro kè mé oare à wii lé, gbasa à lé.

11 Aḡ gaa wà liga wéte pìzi kōn àkpatio gèn do le, ben aḡ èara wà tà ní bùran aḡ ì gwe.

12 Yosua fèe kongo ide'ide, ben sa'orino Dii àkpati sè.

13 Sa'ori gōon swèeplaaa kè aḡ kuu kūna pìno do Dii àkpatine ae, aḡe pèe. Zìkpèeno doḡne ae, parii té àkpati pì kpèe, bensō kuuno ɔ do.

14 Aã lìga wéte pìzi gènn do à gurɔ plaadee zĩ, ben aõ èara wà tà n bũran. Aõ kè le ai gurɔ swεedo.

15 À gurɔ swεεplaadee zĩ aõ fεε idε'idε gudɔnao, ben aõ èara wà gàa wà lìga wéte pìzi lán aõè ke nà. Mɔde zĩ beee aõ ligazi gènn swεεplaame.

16 À gènn swεεplaadee pìà gurɔ kè sa'orinɔ e gaa n̄ kuu pé gbāngbān, ben Yɔsua bè gbēnɔnε: À wii lé, zaake Dii wéte pì kpàawame.

17 Dii wéte pì kɔn pɔ kè kúnno diε a pɔ ũ. Wà n̄ kaate n̄ píngi. Kaarua Rahabu kɔn gbē kè aõ kúo à bεenɔ bé wé bɔ nt̄εε, zaake àmbe à gu'asiigwari kè wà n̄ zĩnɔ ùte.

18 À làakari ke! Àton pɔ kè Dii tè ke séro, le àton kaatero yānzi. Tó á sè, é yā gáε a bũranε à gɔ kaatena pɔ ũ.

19 Kondogi kɔn vurao kɔn m̀gotē pɔnɔ kɔn m̀si pɔnɔ píngi né Dii pómε. Séde wà ká Dii auziki utekiin.

20 Kè wà kuu pè bensɔ Isarailinɔ wii lè gbāngbān le, wéte bĩnɔ lèε. Ben aõ baade sìn súusu, ben aõ wéte pì s̄i.

21 Aõ pɔ kè kúnno diε Dii pɔ ũ, ben aõ gbēnɔ kàate n̄ píngi kɔn f̄εdaao, gɔgbēnɔ kɔn nɔgbēnɔ, né fétenɔ gbēnsinɔ kɔn zùnɔ kɔn s̄aanɔ kɔn zaakinɔ.

22 Yɔsua bè gɔɔn plaaa kè aõ gàa wà bùsu pì asii gwànɔnε: À gē kaarua pì bεen à bɔo kɔn a gbēnɔ, lán a à lé gbēnε nà.

23 Ben gɔkpare pìnɔ gàa wà b̀ kɔn Rahabuo kɔn a deo kɔn a dao kɔn a v̄linɔ kɔn a dāaronɔ kɔn a gbēnɔ n̄ píngi. Aõ s̀o kɔn à danenɔ n̄ píngi, ben aõ n̄ káε Isarailinɔ bùra sae.

24 Ben aõ té sè wéte pìà kǒn pò kè kúnno píngi, tó èe ke kondogi kǒn vuraò kǒn m̀ogotē póno kǒn m̀osi pò kè aõ sèe wà kàe Dii bisakuta auziki utekiin baasiro.

25 Yousua tò kaarua Rahabu b̀ò aafia kǒn à de b̀edeeno kǒn à gbēno ń píngi, kè à gu'asiigwari kè Yousua ń zī Yeriko asii gwaano ùte yānzi, ben aõ g̀ò Isarailino té ai kǒn a gb̀aao.

26 Guro beea Yousua lé kè à bè: Dii láari ke gbē kè eé f̀ee à Yeriko wéte kè keke à káea.

Tó à à b̀i ēe kpàe, à daudu é ga.

Tó à à gb̀ano p̀ee s̀, à né zāadee é ga.

27 Dii kú kǒn Yousuaò, ben à tó dà b̀usu p̀ila píngi.

7

Akã durun yá

1 Isarailino t̀e pò kè. Kaami né Akã, Zimiri dio, Zera sẁakp̀ee, Yuda borii bé à t̀e pò kenò s̀e, ben Dii pò f̀e Isarailinozi.

2 Yousua gbēno zī à bè, aõ b̀o Yeriko wà gá Ai kè kú Betavē sae Beteli of̀antēb̀oe kpa le wà b̀usu p̀i asii gwa. Ben aõ g̀a wà Ai asii gwà.

3 Kè aõ s̀u Yousua kiia, aõ b̀ene: Aideeno pariro, èe ká wà gá gwe wa píngiro. Tó g̀on wàa kuri ke wàa g̀eroo g̀a, aõé wéte p̀i sí. Nton ãa da gbēno ń píngiro.

4 Kè g̀on wàa g̀eroonò g̀a gwe, ben Aideeno ń fú

5 aõ p̀em̀ma b̀ona zaa ń wéte b̀ilea ai gb̀ewikiia, aõ ń déde s̀isigeezi g̀on baaakuri aẁeesẁeedo. Ben sẁe kè Isarailino aõ ninii dà batan.

6 Yousua a uta gá à kè à dàe a puua Dii àkpati ae ai uusiē. Àpi kǒn Isaraili gb̀ensino b̀usu k̀uku ń m̀ia.

7 Ben Yousua bè: Á'á, Dii Luda! À kè dia n wa bikū Yodaa n wa na Amōrinōne n zī aō wa kaateε? Tó wá v̄ēena Yoda baa k̄āa kpa yā né!

8 N yā nna Dii! Zaake Isarailinō bōru kpee n ibeεnōne, mé be dia saa?

9 Kanaanō kōn būsū kè deenō é yā pì ma n píngi, aō ligawazi aō wa kaate andunan. N tó bitakeε sō né? Né keo diamε?

10 Ben Dii bè Yousuanε: N̄ fee n ze! À kè dia n daena n puua?

11 Isarailinō durun kè, aō ma bà kuunaíyo yā gbòro. Aō t̄è pó kenō sè, aō kp̄ai ò, aō mōnafiki kè, aō pó pì dà n pónō guu.

12 Beee yānzi aōe f̄ō wà n ibeεnō gā f̄iro. Aō bōru kpeeñne, kè aō ḡō kaatena pó ū yānzi. Mégō kúao d̄oro, séto a t̄è pó kè kú a ténō kàate.

13 N̄ fee n gá gbāsī bō n gbēnōn. N̄ beñne aō gbāsī bō n zīndan ai guu ḡō gá d̄o, zaake mamōma Dii Isarailinō Luda ma bè, t̄è pó kú a tème. É f̄ō à ze a ibeεnō aεro séto à pó pì b̄ò a té.

14 Tó guu d̄ò, à s̄mazi bori kōn boriio. Borii kè má sè é s̄mazi danεdanε, danε kè má s̄enō é s̄mazi uale kōn ualeo, uale kè má sè s̄o, à ḡōgbēnō é s̄mazi doodo.

15 Gb̄ε kè wà gá wà t̄è pó pì èa, weé adee kpata kōn pó kè à v̄inō píngi, zaake à ma bà kuunaaō yā gbòromε, à wí dà Isarailinōa.

16 Yousua f̄εe kōngō ide'ide, à tò Isarailinō s̄ō Diizi bori kōn boriio, ben gbè Yuda borii sè.

17 Ben à tò Yudanō s̄ōzi danεdanε, ben gbè Zera danenō sè. À tò Zera danenō s̄ōzi uale kōn ualeo, ben gbè Zimiri ua sè.

18 Ben à tò à ua gōgbēno sōzi doodo, ben gbè Kaami né Akā, Zimiri dio, Zera swākpee, Yuda borii sè.

19 Ben Yosua bè Akāne: Né, n̄ yāpura a o n̄ bèe lí Dii Isarailino Ludane. N̄ yā kè n̄ kè om̄e. N̄ton à ke utem̄ero.

20 Ben Akā wèala à bè: Yāpuram̄e, ma durun kè Dii Isarailino Ludane. Yā kè má kèn yè.

21 Ma Babilonia gumusu maa è n̄ póno té kōn kondogio kiloo plaa kōn vura kiloo kusuo, ben à nii gèmagu má sè. À utena wèen ma kpén, kondogi kú gīzī.

22 Ben Yosua gbēno zì gwe. Aō kè kpa aō gàa wà gè à kpén, ben aō è utena gwe, kondogi kú gīzī.

23 Ben aō sèe wà m̄do Yosuan̄e kōn Isarailino n̄ píngi, aō kàe Dii āe.

24 Ben Yosua kōn Isarailino Zera swākpee Akā sè kōn kondogi pìo kōn gumusu pìo kōn vura pìo kōn à négōgbēno kōn à n̄nōgbēno kōn à zùnō kōn à zaakinō kōn à s̄aanō kōn à bisakutaaō kōn à póno píngi, aō gàaño Akoo guzur̄en.

25 Ben Yosua bè: N̄ yā gàewe fá! Dii é yā m̄on̄ne gbàa s̄o. Ben Isarailino à p̄apa gbèo n̄ píngi, aō à dè kōn à gbēno n̄ píngi, ben aō n̄ kpáta.

26 Aō gbè kàkaàla, gbèdidikōana bíta pì kú gwe ai kōn a gbàao. Ben Dii p̄of̄e kpàe. Beee yānz̄in wè be guu p̄in̄e Akoo guzur̄e.

8

Ai kaatena

1 Dii bè Yosuan̄e: N̄ton tó v̄ia n̄ kūro. N̄ton bídi kero. N̄ z̄ikp̄eenō s̄ee n̄ ḡányo n̄ píngi, à l̄ee Aia, zaake

ma Ai kína nànnè n ɔzĩ kɔ̃n à gbě̃nɔ̃ kɔ̃n à wéteo kɔ̃n à bùsuo.

² Ñ ke Ai kɔ̃n a kínaone lán n kè Yeriko kɔ̃n a kínaone nà, mode é f̃s̃ à n pónɔ̃ kɔ̃n n pókãdeenɔ̃ sée a pó ũ sa. Ñ naéñne n wéte kpee.

³ Ben Yosua kɔ̃n a zìkpeeɔ̃ gàa wà lée Aia n píngi. À g̃s̃agbãaanɔ̃ sè g̃ɔ̃n bɔ̃rɔ̃ baaakuri, ben à n gbáe gwãavĩ

⁴ à bèñne: À swã kpá! À naéñne n wéte kpee. Àton ke zà wéte pìoro. Àg̃ó kú soru guu a píngi.

⁵ Mapi kɔ̃n gbě̃ kè aɔ̃ kúmaonɔ̃ wé s̃s̃ wéte pìzi. Tó aɔ̃ bò dawale, wég̃ó bàa léñne lán káaku bà.

⁶ Aṣé péwa ai aṣé kē n wétea zà, zaake aṣég̃ó daa wée bàa lèñne lán káaku bàme. Tó wée bàa lèñne le,

⁷ à f̃e a utekiia à wéte pì sí. Dii a Ludaa nàare a ɔzĩme.

⁸ Tó a wéte pì s̃i, à té s̃s̃a lán Dii ò nà. À làakari ke, à ke lán má diare nà.

⁹ Ben Yosua n gbáe, aɔ̃ gàa guu kè aṣé e wà n zamba ken. Aṣ nàe Beteli kɔ̃n Aio dagura Ai ɔf̃antēg̃ekpen kpa. Gwãavĩ beee a Yosua i b̃uran gwe kɔ̃n a gbě̃nɔ̃.

¹⁰ À f̃e k̃ongɔ̃ ide'ide à gbě̃nɔ̃ kàk̃s̃a, ben àpi kɔ̃n Isaraili gbě̃nsinɔ̃ d̃òñne a e ai aɔ̃ gàa káo Ai.

¹¹ Zìkpee kè aɔ̃ kúonɔ̃ s̃s̃ wéte pìzi n píngi. Kè aɔ̃ kào k̃i, aɔ̃ bùra kàe à a e gu'igbároo kpa. Guzure kú n dagura kɔ̃n Aio.

¹² Yosua gbě̃nɔ̃ sè b̃oro s̃oro. À g̃iake à n úte Beteli kɔ̃n Aio dagura kò Ai ɔf̃antēg̃ekpen kpa.

¹³ Isarailinɔ̃ bùra kàe wéte gu'igbároo kpa, bens̃s̃ gbě̃ kè aɔ̃ naena p̃inɔ̃ kú wéte ɔf̃antēg̃ekpen kpa. Gwãavĩ beee a Yosua i guzuremme.

14 Kè Ai kína Isarailinɔ è le, àpi kɔn a wétedeeno fɛe wà kè kpaa wà gàanzi kɔn zɔo guu kè ae dɔ Araba gbáaa. À dɔ kè gbɛnɔ naena a wéte kpɛero.

15 Yɔsua kɔn Isarailinɔ e kee lán wà be Aideenɔ e n fuu bà, aɔɔe bàa leɛ́ne aɔ mì pè gbáaa.

16 Aideenɔ kɔ sisi n pínɡi aɔ bɔe wà pé Yɔsuanɔ, ben aɔ pèmma ai aɔ gàa wà kè n wéte zãazã.

17 Gɔgbɛ kee e gɔ wéte guuro, aɔ bɔe wà pè Isarailinɔ n pínɡi, ben aɔ n wéte bɔile tò wɛna, aɔɔe pɛe Isarailinɔ.

18 Dii bè Yɔsuanɛ: N sári kè n kúna dɔ Aia, zaake má nanne n ɔzĩme. Ben Yɔsua a sári pì dɔ Aia.

19 Kè à ɔ pòro le, ben gbɛ kè aɔ naenanɔ fɛe wà sɔ wétɛn gɔɔ aɔ sɔ, ben aɔ kè kpaa wà té sɔa.

20 Kè Aideenɔ liɛ wà n kpɛe gwà, ben aɔ è tésukpe fɛe à dà n wétela, ben aɔɔe gákii e dɔro, zaake Isaraili kè aɔ bàa lè wà mì pè gbáaanɔ liɛ wà ae dɔ n pemmari pìnɔa.

21 Kè Yɔsua kɔn Isarailinɔ è n gbɛ kè aɔ naenanɔ wéte sɔ bensɔ tésukpe fɛe à dà wétela, ben aɔ èara wà lèe Aidee pìnɔa.

22 Isaraili kpaaanɔ bɔe wéte pìn aɔ gàa Aideenɔzi kɔn zɔo, ben aɔ ligánzi. Aɔ lèɛ́mma, ben aɔ gbɛkee e e à bɔro, aɔ gbɛkee e e à bàa lèro.

23 Mɔde aɔ Ai kína kù bɛe aɔ gàao Yɔsuanɛ.

24 Isarailinɔ Aideenɔ dède míómíɔ buraanɔa kɔn sètɛnɔ guu kè aɔ n lén. Kè aɔ Aideenɔ dède kɔn fɛedaaɔ le, ben aɔ èara wà gè wéte pìn, aɔ gbɛ kè aɔ gò gweenɔ dède dɔ.

25 Gbɛ kè aɔ gàga zĩ pìanɔ gɔgbɛnɔ kɔn nɔgbɛnɔ n pínɡi gɔɔn bɔro kuri awɛɛplaame. Aideenɔ sɔ lén gwe.

26 Yŏsua ɔɔ kɛ̀ à sári kŭnao pì kpé dɔ ai wà gàa wà Aideenɔ dúgu zŏo.

27 Isarailinɔ wéte pì pókádeenɔ kŏn à pónɔ nàkŏa wà tàò lán Dii ò Yŏsuanɛ nà.

28 Len Yŏsua té sŏ̀ Aia ɛ, à tò à gŏ̀ bezĩ ũ, ben à gŏ̀ da kori ai kŏn a gbáao.

29 Ben à Ai kína lògo lía ai uusie. Kè ɔfántē e gēe kpén, à bè wà à gè bakē lía wà zu wéte bīilea gwe. Ben wà gbè kàkŏaa paripari, gbèdidikŏana pì kú gwe ai kŏn a gbáao.

Dii bà kuuna kŏn Isarailinɔ kekɛna Ebalá kpíii musu

30 Yŏsua Dii Isarailinɔ Luda gbāgbākii bò Ebalá kpíii musu

31 lán Dii zòbleri Musa diɛ Isarailinɔnɛ nà. À bò lán Musa kè a doka takada guu nà, à bè wà bo kŏn gbè kè wèe gā péɛa wà àroonɔ. Ben wà sa'opɔ kè wè ká tén à té kŭ ò Diia gwe kŏn sáabukpana sa'opɔnɔ.

32 Ben Yŏsua doka kè Musa kè pì kè gbè pìnɔa gwe Isarailinɔ wáa.

33 Isarailinɔ píngi, bɛdeenɔ kŏn bòamɔnɔ kŏn n̄ gbēnsinɔ kŏn n̄ dɔn'aɛdeenɔ kŏn n̄ yākpaekɛrinɔ zena àkpati sae ɔplazi kŏn ɔzezio. Aŏ aɛ dŏ̀ Levi bori sa'ori kè aŏ̀gŏ̀ Dii bà kuunańyo àkpati senanɔa. Gbē kpadoonɔ aɛ dɔna Gerizimu kpíiia, gbē kpadoonɔ sŏ̀ Ebalá kpíiia, lán Dii zòbleri Musa gíake à diɛ wà sa maaa o Isarailinɔnɛ nà.

34 Beee gbera Yŏsua dokayā pìnɔ kyó kèńne píngi, aubarika kè Dii è dańgunɔ kŏn kè è bońgunɔ lán à kú Musa doka takada guu nà.

35 Yā kè Musa dienɔ té píngi, à kee e gō kè Yousua gi à kyó ke pariineziro. Baa nɔgbɛnɔ kɔn né fétenɔ kɔn bɔamɔ kè aɔ kú n ténɔ kú gwe n píngi.

9

Gibiɔdeenɔ ɔndɔkena Isarailinɔzi

1 Borii kè aɔ kú Yoda ɔfãntɛgɛkpen kpaanɔ, sɔsɔdeenɔ kɔn gusararadeenɔ kɔn ísialɛadeenɔ ai à gàa pé Lebanɔ búsua, Itinɔ kɔn Amɔrinɔ kɔn Kanaanɔ kɔn Perizinɔ kɔn Ivinɔ kɔn Yebusinɔ, kè aɔ kɔnanɔ Ai yā pì baaru mà,

2 ben aɔ kɔ kàkɔa n píngi le wà gá wà zì ká kɔn Yousua kɔn à gbɛ Isarailinɔ.

3 Kè Gibiɔdeenɔ yā kè Yousua kè Yerikonɛ kɔn Aio baaru mà,

4 aɔ ɔndɔɔ dàɛnzi. Aɔ kúsãɛ kàka sàki zikūnanɔ guu aɔ dɔdɔ zaakinɔnɛ kɔn geepiwɛ tùu zi parana nabinabinanɔ.

5 Aɔ kyate nambata nanananɔ kpákpana, aɔ pɔsia utanɔ dadana. Aɔ bureɔdi kúsãɛ gagana bensɔ à pù kpà.

6 Aɔ fɛɛ wà gàa wà Yousua lè kɔn a gbɛnɔ Giligala bùran, ben aɔ bènnɛ: Bùsu kè wa bɔn zà. Wá yezi à ledole keɔwao.

7 Ben Isarailinɔ bè Ivi pìnɔnɛ: Tó a beɛ kú kè kɔime, wé ledole keaoro yoo!

8 Ben aɔ bè Yousuanɛ: N zɔblerinɔn wa ũ. Ben Yousua n lá à bè: Dénɔn a ũu? A bɔ máme?

9 Aɔ wèala wà bè: Wamɔwa n zɔblerinɔ, wa bɔ bùsu zàazãmmɛ Dii n Luda tó kè dàgula yãnzì. Wa à baaru mà kɔn yā kè à kè Igitinɔ píngi

10 kōn yā kè à kè Amōrinō kína gōōn plaaa kè aōō kú Yoda baa kāa kpaanōne, Esebō kí Siō kōn Basā kí Ogu kè kú Asataroo.

11 Wa gbēnsinō kōn wa būsudeenō bè wà kūsāe sé wà mó wà a le, wà beare a zōblerinōn wa ũ. Beee yānzi à ledole kewao.

12 Wa kūsāen yè. Wa bōo be buredi wāaa ũme gurō kè wa da zén wée mōo a kiia. À gwa dian à kori kù nà à pù kpà.

13 Wa geepiwē tūunōn yè. Wa geepiwēe kàn tūu dufu ũme. À gwa dian aō pàrapara nà. À wa utano kōn wa kyateenō gwa. Aō yàkayaka tá gbāa kè wá ò yānzi.

14 Ben Isarailinō n kūsāe blènyo Dii lé sae.

15 Yousua ledole kènyo à bè é n dederō, ben Isaraili dōn'aedeenō la dà à yā musu.

16 Aō ledolekenanyo gbera à gurō aagōdee zī, ben aō mā kè aō be zānyoro, aō kú kō saeme.

17 Ben Isarailinō dà zén, à gurō aagōdee zī aō kà n wétēnō kiia, Gibiō kōn Kefirao kōn Beroo kōn Kiriayarimuo.

18 Aōe léémāro, zaake aō dōn'aedeenō sīnne kōn Dii n Luda tōome. Gbē píngi e wisōo n dōn'aedeenōzi,

19 ben dōn'aedee pīnō bènne: Wámbe wá sīnne kōn Dii wa Luda tōo. Èe kō sío kè wà o namma doro.

20 Yā kè wé kénnen yè. Wé n tó gwe ladana kè wá kènnne yānzi, le Dii pōfē tón pita wa musuro.

21 Ben aō èara wà bè: Wà n tó, aōégō de wa yàkawerinō ũ kōn wa ítōtorinō. Ben Isarailinō zè kōn n dōn'aedeenō yā pìo.

²² Ben Yosua Gibiḡdeenḡ sḡsi à bèñne: Bóyānzin a εγεε tòwe lezi? Ase wá kaena kḡ gbálame, ben a bè a kúkii zāwaoḡ?

²³ A gḡ kana pḡ ũ ma Luda kiia sa. Égḡ de à kpé yàkawerinḡ ũ kḡn à ítḡḡrinḡḡ guro píngi.

²⁴ Ben aḡ bèñne: Wà bè wamḡwa n zḡblerinḡne súusu lán Dii n Ludaa ò a zḡbleri Musane nà. À bè é bùsu pḡ kpáawa píngi à gbē kè aḡḡ kúnno kaateare n píngi. Vīa wa kḡ maamaa wa wèndi yā musu, beee yānzi wa kè lezi.

²⁵ Wá kú n ḡzīme sa. Yā kè kènnne maa bensḡ à zé vīn kewe.

²⁶ Len Yosua kè le à n bḡ Isarailinḡ ḡzī, aḡḡe n deḡero.

²⁷ Zī beeean à n díe Isarailinḡ yàkawerinḡ kḡn n ítḡḡrinḡ ũ, aḡègḡ yàka weε, aḡègḡ í tḡḡḡ Dii gbāgbākiine guu kè Dii é dien. Ben aḡḡ kuu le ai kḡn a gbāao.

10

ḡfāntē zena a gbèn

¹ Yerusalemu kí Adonizedeeki mà kè Yosua Ai sḡ à kène dúgudugu, à kè Aine kḡn a kínao lán à kè Yeriko kḡn a kínaone nà. À mà ḡḡ kè Gibiḡdeenḡ kḡ yā mà kḡn Isarailinḡ bensḡ aḡḡ kú kḡ saε.

² Ben vīa Yerusalemudeenḡ kḡ maamaa, zaake Gibiḡ né meεwime lán kína wéte ke bà. À bíta de Aila bensḡ à gḡgbēnḡ né zīkari gbāaanḡme.

³ Ben Yerusalemu kí Adonizedeeki lékpāsā kè Eblḡnu kí Oamune kḡn Yamu kí Piramuo kḡn Lakisi kí Yafiao kḡn Egelḡni kí Debio à bè:

⁴ À mḡ à ḡmale wà gá léε Gibiḡdeenḡa, zaake aḡḡ kḡ yā mà kḡn Yosuaḡ kḡn Isarailinḡ.

⁵ Ben Amorinɔ kína gɔɔn sooro pìnɔ, Yerusalemu kína kɔn Eblonu kínao kɔn Yamu kínao kɔn Lakisi kínao kɔn Egeloni kínao kɔn n zìkpɛɛnɔ kɔ kàkɔa. Aɔ gàa wà bùra kàe Gibiɔ sae, ben aɔ gàaŋzi kɔn zìo.

⁶ Ben Gibiɔdeenɔ gbɛnɔ zì Yɔsuaa Giligala bùran aɔ bè: Nton pã kpá wamɔwa n zòblerinɔziro. N ke kpaa n mɔ n wa mì sí. N mɔ n dɔwale, zaake Amorinɔ kína kè aɔ kú gusĩideenɔ kàkɔawazi n píngi.

⁷ Ben Yɔsua kɔn a gɔsagbãaanɔ kɔn a zìkpɛɛnɔ bɔe Giligala, aɔe mɔɔ n píngi.

⁸ Ben Dii bè Yɔsuane: Nton vĩa keńnero. Ma n nánne n ɔzĩ, aɔ gbɛke é fɔ à n gá fĩro.

⁹ Bɔna Giligala Yɔsua táa ò gwãavĩ ai guu gàa à dòo à sùrma kãndo zena sai.

¹⁰ Ben Dii tò aɔ kè gĩri aɔ lèkɔa Isarailinɔ ae, ben Isarailinɔ lèrma aɔ n déde maamaa Gibiɔ gwe, ben aɔ pèrma Betoroni zén dɔ. Aɔ n déde ai à gàa pé Azeka kɔn Makɛdaoa.

¹¹ Kè aɔe bàa lee Isarailinɔne zé kè bò Betoroni kè à gàa Azeka guu, Dii loughɛ gbɛntɛ sì n té. Gbɛ kè loughɛ pì n dédenɔɔ pari de gbɛ kè Isarailinɔ n déde kɔn fɛɛdaaonɔla.

¹² Gurɔɔ kè Dii Amori pìnɔ nà Isarailinɔne n ɔzĩ, ben Yɔsua yã ò Diio Isarailinɔ wáa à bè:

N tó ɔfántɛ ze a gbèn Gibiɔla!

N tó mɔɔ ze tee Ayalɔni guzurela!

¹³ Ben ɔfántɛ zè a gbèn le, ben mɔɔ zè dɔ ai Isarailinɔ gàa wà gɛe bò n ibeenɔa. Yã pì kú Yasa takadan. ɔfántɛ gò zena mìdangura, èe gu a gbènlo ai gurɔ do gbãngbã.

14 Wèe gurɔ beee taka e zikiro, bensɔ wèe e à gberaro. Dii gběntee yā mà, zaake èe zì kaa Isarailinɔnemε.

15 Ben Yosua tà Giligala bùran kɔn a gběnó ń píngi.

Yosua Amɔri kɔnanɔ dedena

16 Kè kí gɔɔn sɔɔroo pìnɔ bàa lè, wà gaa wà ùte gbèwεen zaa Makeda,

17 ben wà bè Yosuanε: Wà bò kí gɔɔn sɔɔroo m̀nɔa gbèwεen zaa Makeda.

18 Ben Yosua bè: À gbè gbèntēnɔ yīpa à tata gbèwεε pìlε, à gběnó diε gwe wàgɔ́ dákpa.

19 Àton zero. À péε a ibεεnɔzi à léémma kpεε kpa. Àton tó aɔ́ ń wétεnɔ lero, zaake Dii a Luda ń náare a ɔ̀zĩmε.

20 Yosua kɔn a gběnó ń déde ai aɔ́ yezi wà yāa, aɔ́ gbē kè aɔ́ b̀nɔ kà ń wéte bīideeno guu.

21 Ben Isarailinɔ sù Yosuaa bùran Makeda aafia ń píngi. Gbēkee e f̄ à yāke ò Isarailinɔ yā musu dɔro.

22 Ben Yosua bè: À gbè go gbèwεε pìlε à bɔεmε kɔn kí gɔɔn sɔɔroo pìnɔ.

23 Ben aɔ́ kè lε aɔ́ b̀εnε kɔn kí gɔɔn sɔɔroo pìnɔ, Yerusalemu kína kɔn Eblɔnu kínao kɔn Yamu kínao kɔn Lakisi kínao kɔn Egelɔni kínao.

24 Kè wà ń b̀é lε, ben à Isaraili z̀kpεεnɔ s̀isi ń píngi à bè ń dɔn'aεdee kè aɔ́ g̀aaonɔnε: À s̄ k̄i à gbá zεzε kína kènɔ waaa. Ben aɔ́ mò wà gbá zèzε ń waaa.

25 Yosua bèn̄nε: Àton tó v̄ia a kũro, àton bídi kero. À zε gbāa àḡ w̄rɔngɔ v̄i, zaake len Dii é kε lε kɔn a ibεε kè é z̀ kán̄yonɔ ń píngi.

26 Beee gbera Yosua ń déde à ń lógo lía, baade kɔn a lío, ben aɔ́ g̀ logologona gwe ai uusie.

27 Kè ɔfántɛ e gɛɛ kpén, à bè wà ñ gèno bakɛ lí pìnoa wà ñ zu gbèwɛɛ kè aɔ ùten pìn. Ben wà kè ɛ, wà gbè gbèntɛno tàta wɛɛ pìɛ, à kú gwe ai kɔn a gbáao.

28 Zĩ beeean Yosua Makɛda sì. À à kína kɔn à gbɛno dèdɛ ñ píngi kɔn fɛɛdaao à ñ káate. Baa gbɛ mèn doo e boro. Ben à kè Makɛda kínane lán à kè Yɛriko kínane nà.

Yosua zìblena Amɔrinɔ búsua

29 Yosua kɔn Isarailino bɛ Makɛda ñ píngi, ben aɔ gàa Libina aɔ lèea.

30 Dii wéte pì kɔn a kínao nàñne ñ ɔzĩ, ben aɔ ñ dèdɛ kɔn fɛɛdaao ñ píngi, aɔ gbɛkee e boro. Ben aɔ kè à kínane lán aɔ kè Yɛriko kínane nà.

31 Ben Yosua kɔn a gbɛno bɛ Libina aɔ gàa Lakisi. Aɔ lìgazi aɔ lèea.

32 Dii Lakisi nàñne ñ ɔzĩ, à guro plaadee zĩn aɔ sì. Aɔ gbɛ kè aɔ kúnno dèdɛ kɔn fɛɛdaao ñ píngi lán aɔ kè Libinane nà.

33 Kè Gɛza kí Oramu mò à do Lakisideenɔ, ben Yosua zì blèa kɔn à zìkpɛɛno, aɔ gbɛkee e boro.

34 Aɔ bò Lakisi, ben aɔ gàa wà lìga Egelɔnizi aɔ lèea.

35 Aɔ wéte pì sì zĩ beee a gɔ, ben aɔ gbɛ kè aɔ kúnno dèdɛ kɔn fɛɛdaao aɔ ñ káate lán aɔ kè Lakisine nà.

36 Kè aɔ bɛ Egelɔni, ben aɔ gàa Eblɔnu aɔ lèea.

37 Aɔ wéte pì sì aɔ à gbɛno kɔn à kínao dèdɛ kɔn fɛɛdaao kɔn à lakutudeenɔ. Aɔ gbɛ kè aɔ kúnno kàate, aɔ gbɛkee e boro, lán aɔ kè Egelɔnine nà.

38 Ben aɔ gàa Dɛbi aɔ lèea.

39 Aɔ wéte pì sì kɔn à kínao kɔn à lakutuno píngi. Ben aɔ ñ dèdɛ kɔn fɛɛdaao aɔ gbɛ kè aɔ kúnno kàate lán aɔ kè Eblɔnune nà, aɔ gbɛkee e boro. Aɔ kè

Dεbine kōn à kínao lán aō kè Libinane kōn à kínao nà.

⁴⁰ Yōsua bùsu pì deeno kōn à kínao dède ní píngi, gusĩsĩdeeno kōn Nεgevideeno kōn gusararadeeno kōn sīsĩgeedeeno ní píngi. Èe gbēke tó bēero, à gbē kè aō kú gweeno kàate lán Dii Isarailino Ludaa òne nà.

⁴¹ À ní dède sena zaa Kadesi Banεa ai à gàa pé Gaza, zaa Gosē bùsun píngi ai à gàa pé Gibiōa.

⁴² Yōsua zì blè kína pìnoa kōn ní bùsunò gèn do gō, kè Dii Isarailino Ludaa e zì kaañe yānzi.

⁴³ Ben à èara kōn a gbēno bùran zaa Giligala.

11

Yōsua zì ble à mìena Kanaa bùsua

¹ Kè Azo kí Yabī à baaru mà, à gbēno zì Madō kí Yobabua kōn Simirōnu kínao kōn Akasafa kínao

² kōn kína kè aō kú gu'igbāroo kpaano ní píngi, kína kè aō kú gukpiideeno kōn sètepoōtu kè kú Galili soomete kpaao kōn gusararaao kōn Dōru gusĩsĩdee kè kú ɔfántēgēkpen kpaao.

³ Ben à èara à gbēno zì do Kanaa kè aō kú ɔfántēboε kpaanoa kōn ɔfántēgēkpen kpaano ní píngi, Amōrino kōn Itino kōn Perizino kōn Yebusi kè aō kú gukpiideenno kōn Ivi kè aō kú Mizipa bùsun Emōni gbè saeno.

⁴ Aō b̀de kōn ní zìkpεeno ní píngi paripari lán ísiale bùsu'aatē bà. Aō sōno kōn ní sōgorono pari.

⁵ Ben kína pìno kō kākōa aō mò wà bùra kàe lεdo Meromu íno sae, le wà zì ká kōn Isarailino.

6 Ben Dii bè Yosuanε: Nton vĩa keñnero. Zia mɔndaa'i mé n̄ na Isarailinɔne n̄ ɔzĩ aɔ n̄ dede. N̄ n̄ s̄ɔnɔ gbátĩkyanɔ z̄z̄z̄ n̄ n̄ s̄ɔgoronɔ kpata.

7 Ben Yosua k̄ɔn a z̄ĩkpεεnɔ gaañzi z̄lɔ kãndo n̄ píngi aɔ d̄añla Meromu ínɔ saε gwe.

8 Dii n̄ náñne n̄ ɔzĩ, ben aɔ n̄ dede aɔ pè n̄ gbēkenɔa ai Sid̄ m̄εwin k̄ɔn Misirefo Maimuo k̄ɔn Mizipa guzure kè kú ɔfãntēbɔε kpaao. Aɔ n̄ dede, aɔ gbēkee e b̄ɔro.

9 Yosua kèñne lán Dii òne nà, à n̄ s̄ɔnɔ gbátĩkyanɔ z̄z̄z̄ à n̄ s̄ɔgoronɔ kpàta.

10 Zĩ p̄ia Yosua liara à gàa à Azo sì, ben à à kína dè k̄ɔn f̄εdaao. Azo p̄in kína p̄inɔ wéte m̄idee ũ guro beeea.

11 Isarailinɔ gbē kè aɔ kúnno dède k̄ɔn f̄εdaao aɔ n̄ káate, aɔ gbēkee e ḡɔro, ben aɔ té s̄ã.

12 Yosua wéte p̄inɔ sì píngi k̄ɔn n̄ kínano, à n̄ dede k̄ɔn f̄εdaao à n̄ káate lán Dii z̄òbleri Musa ò nà.

13 M̄ode Isarailinɔ e té s̄ɔ wéte kè wà èara wà kàε n̄ bezĩ gbènn̄aro, séde Azo kè Yosua té s̄ã p̄i baasiro.

14 Isarailinɔ wéte p̄inɔ p̄onɔ nàk̄ɔa n̄ p̄ó ũ k̄ɔn n̄ p̄ókãdeenɔ aɔ tàò. Aɔ n̄ gbēnɔ dède k̄ɔn f̄εdaao n̄ píngi ai aɔ n̄ káate, aɔε gbēke tó b̄εero.

15 Yã kè Dii ò a z̄òbleri Musanε, Musa yã p̄i ò Yosuanε, ben Yosua kè le píngi, èe yã kè Dii ò Musanε ke tóro.

16 Len Yosua bùsu p̄i sì le píngi, à gukpiide k̄ɔn Negevio píngi k̄ɔn Gos̄ bùsuo píngi k̄ɔn gusararaao k̄ɔn s̄εtepoɔtuo píngi. À Isaraili gukpiide k̄ɔn gusararaao sì

17 sena zaa Alaki gbè kè kú Sei bùsun ai à gàa pé Baali Gada kè kú Lebanɔ bùsu guzuren Em̄oni gbè

sae. À n kɪnɔ̀ kùkù n pɪngi à n dɛdɛ.

¹⁸ À zɪkana gi kɛ kɔ̀n kɪna pɪnɔ̀ n pɪngi.

¹⁹ Ivi kɛ aɔ̀ kú Gibiɔ̀nɔ̀ baasiro wɛtɛ kee e kɔ̀ yā mà kɔ̀n Isarailinɔ̀ro, aɔ̀ n blé zɪo pɪngi.

²⁰ Dii bé à tò aɔ̀ swā gbāgbā, ben aɔ̀ zɪ kà kɔ̀n Isarailinɔ̀, lɛ Isarailinɔ̀ e wà n kaate n wɛndagwana sai, à yāaño māmam lán à ò Musanɛ nà.

²¹ Gurɔ̀ pɪan Yɔ̀sua gàa à Anakinɔ̀ dɛdɛ gukpi-ideen kɔ̀n ɛblɔ̀nuo kɔ̀n Dɛbio kɔ̀n Anabuo. À n káate à n wɛtɛnɔ̀ kɛ dúgudugu Yuda gukpiideen kɔ̀n Isaraili gukpiideeo pɪngi.

²² Anaki bori kee e gɔ̀ Isarailinɔ̀ bɔ̀sun dɔ̀ro, séde Gaza kɔ̀n Gaɔao kɔ̀n Asadɔ̀dio.

²³ Yɔ̀sua bɔ̀su pɪ sɪ pɪngi lán Dii ò Musanɛ nàme, ben à kpà Isarailinɔ̀a à kpàateɛne danɛdanɛ túbi ũ. Ben bɔ̀su pɪ gɔ̀ kaena aafia zɪ sai.

23

Yɔ̀sua lézana Isarailinɔ̀a

¹ À gurɔ̀plaa kɛ kɛ Dii tò Isarailinɔ̀ kámma bò n ibɛɛ kɛ aɔ̀ ligázinɔ̀ yā musu, bensɔ̀ Yɔ̀sua zi kù kótokoto.

² Ben à Isarailinɔ̀ sɪsɪ, aɔ̀ gbɛnsinɔ̀ kɔ̀n n mɛdeenɔ̀ kɔ̀n n yākpækɛrinɔ̀ kɔ̀n n dɔ̀n'aɛdeenɔ̀ n pɪngi, à bène: Ma zi kù kótokoto.

³ A wɛɛ è yā kɛ Dii a Luda kɛ bori beeenɔ̀ne a yānzi. Dii a Luda bé à zɪ kàare.

⁴ Ma borii kɛ aɔ̀ gɔ̀ Yoda dagura kɔ̀n ɔ̀fāntɛgɛkpen kpa ísia bítaonɔ̀ bɔ̀su kpàate a boriinɔ̀ne túbi ũ kɔ̀n borii kɛ ma n káatenɔ̀ pɔ̀o.

⁵ Dii a Luda é ɔ̀ sɔ̀nziare eé pɛ́mmaare, é n bɔ̀sunɔ̀ símma le àgɔ̀ vɪ lán à à lé gbɛ̀are nà.

⁶ À ze gbãa maamaa. À làakari ke àgõ zĩ ke yã kè kú Musa doka takada guua. Àton pãne oplazi ke ɔzeziro.

⁷ A bà tóngõ kú kōn borii kè aõ gǝ a té pìnɔro. Àton n̄ tãanɔ tó sísiro, àton la dańyoro. Àton dońzi à kúéńnero.

⁸ Àgõ naa Dii a Ludazi ado lán ée kee nà ai kōn a gbãao.

⁹ Dii ɔ s̄are bori bíta gbãadeenɔzi, gbẽkee e f̄o à a gǝ firo ai kōn a gbãao.

¹⁰ A gbẽ mèn doo è ḡɔn wàa s̄oɔroonɔ fu, kè Dii a Ludaa e zĩ kaaare lán à à lé gbẽare nà yãzi.

¹¹ À làakari ke maamaa àgõ ye Dii a Ludazi.

¹² Tó a kp̄e l̄ine, ben a na borii kè aõ gǝ a té pìnɔa, tó a n̄ nɔgb̄enɔ sè bensõ a kak̄ańyo,

¹³ àgõ d̄s̄ans̄an kè Dii a Luda é péare borii pìnɔa doɔro. Āé ḡare takut̄e ke mò ũ ke fl̄anɔ ũ a kp̄egura kes̄ kòk̄onɔ ũ a w̄een ai a gaa kaateo bùsu maaa kè Dii a Ludaa kp̄àawa kèkii guu.

¹⁴ À gwa! Ma ka gana anduna p̄ingi gákii sa. Á d̄s̄ a n̄sen kōn a laasuo p̄ingi kè sa maaa kè Dii a Ludaa òareenɔ guu, baa mèn doo e ke p̄aro. À p̄apa p̄ingi, aõ kee e léé p̄aro.

¹⁵⁻¹⁶ Lán sa maaa kè Dii a Ludaa òaree p̄apa a musu nà p̄ingi, tó a Dii a Luda bà kuunaao yã kè à dīearee gb̄oro, a gaa a do tãanɔzi a kueńne, Dii é tó sa zaaa kè à ò pìnɔ p̄ingi a le ai à gá à a kaateo bùsu maaa kè à kp̄àawaa kèkiin. Dii é p̄of̄e pitaawa, é kaate ḡo bùsu maaa kè à kp̄àawaa kèkii pìn.

Yosua gbẽno gbana laakari zaa Sekemu

¹ Yosua Isaraili boriino kàkɔa Sekemu. À Isaraili gbẽnsino kɔn n̄ mĩdeenɔ kɔn n̄ yãkpaekerinɔ kɔn n̄ dɔn'aedeenɔ sisi, ben aɔ mò wà zè Luda ae.

² Ben Yosua bẽne: Yã kè Dii Isarailino Luda a òn yè: A dezinɔ kú Yuflati baa kãa kpame yã, aɔ dò tãanɔzi. Ibraĩ kɔn Naonɔ de Tera kú n̄ té.

³ Ben ma a dezi kãaku Ibraĩ sè zaa Yuflati baa kãa kpa, ma gẽteo Kanaa bũsun píngi, ben má tò à borii kò. Ma à gbà Isaaku,

⁴ ben ma Isaaku gbà Yakubu kɔn Isauo. Ma Isau gbà Sei gusĩsĩdee. Yakubu kɔn a n̄enɔ sɔ aɔ tà Igipiti.

⁵ Ma Musa kɔn Arunao zĩ, ben ma wée tà Igipitinɔa kɔn yã kè má kè n̄ ténɔ, ben ma a bɔen.

⁶ Kè ma a dezinɔ b̀e Igipiti, kè a ka ísiaazi, ben Igipitinɔ p̀eazi kɔn sɔgoronɔ kɔn sɔdeenɔ ai Isia T̄eazi.

⁷ Kè a wii p̀emazi, ben ma gusiaa dà a dagura kɔn Igipiti p̀inɔ, ben má tò ísiao dànl̄a míomio. A wée yã kè má kè Igipitinɔne è. Beee gb̄era a gurɔplaa kè gbáan.

⁸ Ma m̄ao Am̄ori kè aɔɔ kú Yoda ɔfánt̄eb̄e kpaanɔ bũsun. Kè aɔ f̄eazi z̄io, ben ma n̄ náare a ɔzĩ. Ma n̄ káate, ben aɔ bũsu g̀ò a p̄ó ũ.

⁹ Kè Zipo né Balaki, M̄abunɔ kina f̄eazi z̄io, à Beo né Balamu sisi à a ká.

¹⁰ Ben ma gi Balamu yã mazi má tò à sa maaa òare, ma a b̄o Balaki ɔzĩ.

¹¹ Beee gb̄era a bikũ Yodaa a ka Yeriko. Ben Yerikodeenɔ z̄i k̄aao. Am̄orino kɔn Perizinɔ kɔn Kanaanɔ kɔn Itino kɔn Gigasinɔ kɔn Ivinɔ kɔn Yebusinɔ z̄i k̄aao d̄o, ben ma n̄ náare a ɔzĩ.

12 Ma zōmantēno gbàre a ae, aõ pèare Amorino kina gōon plaaano. Èe ke a fēdaa ke a kà bé à pèmmaro.

13 Ma tōte kè áambe a à zīi kèroo kpàawa kōn wéte kè áambe á kàeroon, ben á kú wéte pino guu. Èe geepi lí kōn kù lí kè áambe á bàroono bee blee.

14 Ben Yosua bè: Àgō Dii vīa vī àgō dōzi yāpura kōn nòseo do. À tāa kè a dezinō dōnzi Yuflati baa kaa kpa kōn Igipitino bō a té à dō Diizi.

15 Tó zòblena Diine kèare zaa, èndē à ze kōn tāa kè á yezi à dōzio gbàa, tāa kè a dezinō dōnzi Yuflati baa kaa kpaanon yoo, kesō Amori kè á kú n būsunnō pō. Mōde mamōma kōn ma bēdeenō, Diin wégō dōzi.

16 Ben gbēno wèala wà bè: Gyam! Wé fō wà pā kpá Diizi wà dō tāanoziro.

17 Dii wa Luda bé à wa bō zòbleen Igipiti būsun kōn wa denō. Àambe à dabuyā bíta pino kè wa wāa, à wa dākpa wa taa'ona guu píngi à wa bō borii kè wa gēte n guunō zī n píngi.

18 Dii bé à pèwe Amorino kōn borii kè aō kú būsukèkiinnō. Beee yānzi wégō dō Diizi se, zaake àambe wa Luda ũ.

19 Ben Yosua bè gbēno: È fō à dō Diizi. Zaake à kú adona, Luda nōsegōaanōdeeme. Eé a taarino kōn a durunnō kēarero.

20 Baa kè à yā maaa kèare yā, tó a pā kpāzi a dō bori zītōno tāanozi, eé εara à kisia zīawa à a kaate.

21 Ben gbēno bè Yosuan: Lenlo! Diin wégō dōzi.

22 Ben Yosua bèné: Áambe a zīnda sèedadeenō ũ, kè a zeo àgō dō Diizi. Ben aõ bè: Ee! À sèedadeenōn wa ũ.

23 Ben Yousua bè: Tó lemε, à bori zítɔnɔ tãa kè aɔɔ kúaaɔnɔ bɔ a té à a swè kpá Dii Isarailinɔ Ludaa.

24 Ben gbɛnɔ bène: Dii wa Ludan wégɔ dɔɔzi wàgɔ à yã maa.

25 Zĩ beeean Yousua èara à Dii bà kuunańyo yã kèkε gbɛnɔne. Zaa Sekemu gwe à dokayãɔ kɔn yadienano zé kpàéńne,

26 ben à yã pìnɔ kè Luda doka takadan. Ben à gbè gbèntē sè à pèe gbíí lí gbáru Dii gbāgbākíia gwe.

27 Ben à bè gbɛnɔne: À gwa! Gbè kèkii bé eégɔ dεwe sèedadee ũ. Gbè pì yã kè Dii òwee mà píngi. Eégɔ dεare sèedadee ũ ɛ àton mɔnafiki kε a Ludanero.

28 Yousua gbɛnɔ gbàre, ben baade tà a bùsu kè wà kpàa túbi ũu guu.

29 Yã beeenɔ gbera Dii zòbleri Yousua, Nuni né gà. À kè wè basɔro akuri.

30 Wà à v̄i guu kè de à túbi ũu guu Timina Sera, Eflaimunɔ gukpíideen Gaasi kpii gu'igbāroo kpa.

31 Isarailinɔ dɔ Diizi Yousua gurɔ píngi kɔn gbɛnsi kè aɔɔ kuu à gberaanɔ gurɔɔ dɔ. Gbɛnsi pìnɔ wée sì yã kè Dii kè Isarailinɔnele píngi.

32 Yusufu wánɔ kè Isarailinɔ b̀ò Igipiti s̄, aɔɔ v̄i Sekemu tɔɔte guu, kè Yakubu lù Sekemu de Amɔ nénɔa kondogi basɔro. Tɔɔte pì kú Yusufunɔ túbi guumε.

33 Kè Aruna né Elεaza gà, ben wà à v̄i zaa Gibea, wéte kè wà kpà à né Finεasia túbi ũ Eflaimunɔ gukpíideen.

Luda yá takada kǝn Bokobaru yǎo
The New Testament and portions of the Old Testament
in the Bokobaru language of Nigeria

copyright © 2005 SIM International

Language: Bokobaru

Translation by: SIM

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-09-22

PDF generated using Haiola and XeLaTeX on 18 Apr 2025 from source files dated 31 Aug 2023

c31548a1-5316-53c2-be42-674e0e4c5ae5